

四庫全書

集部

欽定四庫全書

集部

宋元詩會卷五十七

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>王 鍾泰

謄錄舉人<sub>臣</sub>龐兆懋

欽定四庫全書

宋元詩會卷五十七

兵部主事陳焯編

郭震

漁者

江柳弄風顰翠黛  
山花著雨濕胭脂  
却收短櫂拈長笛  
一葉舸中仰面吹

老兵

老來弓劍喜離身說著沙場更愴神  
任使將軍全得勝歸時不盡去時人

雲

聚散虛空去復還野人間處倚筇看  
不知身是無根物蔽月遮星作萬端

江為

江行

越信隔年稀孤舟幾夢歸月寒花露重  
江晚水烟微岸

直帆相望沙空鳥並飛何時洞庭上春雨滿蓑衣

魯交

大雪

方象曉一色皓然天地中楚山雲母障漢殿水精宮  
遠近梅花信高低柳絮風吟魂清不徹和月上晴空

錢昭度

野水

野水光如壁澄心不覺勞與天無表裏共月見分毫綠

好磨長劍清宜汎小舸淡交今已矣惆悵越波濤

方中荀

虎丘

海湧起平田禪扉古木間出城先見塔入寺始登山堂  
靜叅徒散巢喧乳鶴還祖龍求寶劍曾此鑿孱顏

楊修

三山亭

滿目江山異洛陽北人懷土淚千行不如亡國中書令

歸老新亭是故鄉

蠶室

摘繭抽絲女在機  
茅簷葦箔舊堂扉  
年年桑柘如雲綠  
翻織誰家錦地衣

齊雲觀

上界笙歌下界聞  
縷金羅袖鬱金裙  
倚欄紅粉如花面  
不見巫山空暮雲

秦淮

一氣東南王斗牛祖龍潛為子孫憂金陵地脈何曾斷  
不覺真人已姓劉

橫塘

早潮纔過晚潮來一一軒窓照水開鑑面無塵風不動  
分明倒影見樓臺

青溪

傾城傾國兩妃嬪此地聞名不見人潛想舊時紅粉面  
落花風裏步香塵



北渠

金殿分來玉砌流  
黑龍湖撒鳳池頭  
後庭花落恩波斷  
翻與南唐作御溝

半陽湖

江南龍節水為鄉  
水不純陰有半陽  
一片湖光共深淺  
兩般泉脈異溫良

長命洲

梁武慈悲不鼎烹  
蒙恩豢養亦虛名  
狐狸口腹應潛飽

就死多于日放生

天闕山

牛頭天際碧凝嵐  
王導無稽示妄談  
若以遠山爲上闕  
長安應合指終南

白楊路

殘枝敗葉幾霑春  
莫問栽培迹已陳  
細雨斜風恨無力  
蕭蕭滿路更愁人

洞元觀

葛玄功行滿三千白日驂鸞上碧天留得舊時壇宇在  
後人方信有神仙

利登

雜興

我昔此園遊寒梅吐丹艷重來幾何間叢青倏以遍誰  
云花與葉同樹不相見

青陽洞天呈主人曾少裕

兩崖蒼蒼峭天柱停策崖邊喚舟渡青巾羽客打舟來

驚起靈蛇絕溪去千年神漿不自惜萬里晴天安得雨  
但見飛泉落半空空巾此水來何處出下猶涵太古泉  
安知上不通銀浦蒼藤半濕苔蘚昏石罅無根迸孫樹  
洞門一隙僅通人可惜鑿空開洞府先生朝昏息丹崖  
萬壑歸心心不語瑤磬一聲天壁寒白雲紫霧驚相顧

野農謠

去年陽春二月中守令出郊親勸農紅雲一道擁歸騎  
村村鏤榜粘春風行行蛇蚓字相續野農不識何由讀

唯聞今年秋粒顆民不收上堂對妻子炊多糴少饑號  
啾下堂見官吏稅多輸少喧征求呼官視田吏視釜官  
去掉頭吏不顧內煎外迫兩無計更以饑軀受咎箠古  
來丘壠幾多人此日殘生豈難棄今年二月春重見勸  
農文我勤自鍾情自釜何用官司勸我氓農亦不必勸  
文亦不必述但願官民通有無莫令租吏打門叫呼疾  
或言州家一年三百六十日念及我農惟此日

江亭

江亭凭望久野色暝蒼蒼古木浮寒霧空山入夕陽水流前夜月風作早來霜却笑垂綸者因漁亦自忙

寶陀風慕展遊願不從心有作

寶陀十里路此日想同遊萬古不收雨四時長是秋樹寒煙半擁山濕霧還流我獨思歸苦無因到上頭

晚步

住在山塘深更深門前落葉與階平高人聽鶴來相過野老因樵熟識名一水欲流山影去斷雲時傍燒痕生

脩然獨步蓮峰夕十里松風秋月明

張弋

簡周宗聖

曠野有芳芷近江無早鶯春詩定多少旬日又清明樹  
暗憐楊柳花開認橘橙相尋每乖阻夢裏亦愁生

送宋謙父之清江因簡希亮

吟詩夕陽裏相送上蕭灘前路逢梅處同誰倚櫂看歲  
窮風力緊江濶雁聲寒持此呈蘇李人生識面難

懷章別紫芝

吟苦事俱廢拙深貧未除年來如旅鴈秋至即移居古  
道行黃葉空囊貯素書一生江海恨惟予最知余

寄別顏伯奇

情深袂怕分豈不欲辭君轉枕方乘曉思山已隔雲霜  
當前路見雁在半江聞把盞秋纔好遙憐白鷺羣

禪林寺

寺置蕭梁曾識少今朝蘚磴始經過天低日落江湖遠



煙冷風清竹樹多蟲引翠禽行壞屋馬驚白犬吠縣蘿  
一僧九十形容古蟲下逢余忽浩歌

俞汝尚

夏日閒居

無人到窮巷長日守閒居宿火惟烘藥喜晴還曬書鄰  
翁伴村酒稚子課園蔬門外蒿萊地從深不用鋤

裴說

寄邊衣

深閨乍冷開香篋玉筋微微濕紅頰一陣霜風殺柳條  
濃煙半夜成黃葉重重白練明如雪獨下閒階轉淒切  
祇知抱杵搗秋砧不覺高樓已無月時聞塞雁聲相喚  
紗窓只有燈相伴幾展齊紈又懶裁離腸恐逐金刀斷  
細想儀形執牙尺回刀剪破澄江色愁捻金針信手縫  
惆悵無人試寬窄時時舉手勻殘淚紅箋漫有千行字  
書中不盡心中事一半殷勤託邊使

程子山

曜庵釣雪灘

待月凝雲館垂竿釣雪灘  
虛窓堆冷翠傑閣聳高寒  
籠養千齡鶴鑪燒九轉丹  
不須論許事心目自清閒

陳必復

客枕

客枕偏饒睡春歸尚擁綿  
屋深燈易暈漏短夢難圓  
棲鳥警涼夜鬧蛙喧雨天  
一聲柔櫓過何處上溪船

贈張駒駒自號牧隱

乍見語相合苦吟心更親老于琴得趣隱與牧為隣一  
夜簷花雨十年江樹春所交半湖海恨晚識斯人

沈說

溪樓

心遠俗塵隔樓高野興多稻花黃雀雨山影白鷗波灘  
澁推船上橋危挽客過日斜闌倚遍無句奈愁何

縉雲道中

去作京華客離家此月前問程恰中道數日近殘年山

雨易成雪村雲疑是烟僕行愁不進添乞酒漿錢

馮公嶺

曉上馮公嶺艱難見客情雨和殘葉落身逐亂雲行野  
店山腰出秋泉石隙生若將世途比此路更為平

別墅

野舍清溪曲連茅接樹陰呼童隣錯應貫酒婦同斟落  
照收殘雨寒煙出寸岑江湖成夢事投老屬山林

黃大受

晚步

扇小葛衣輕風清草路平水聲逢石怒煙素近山明喚  
犢牛回顧驚人犬倒行耨夫方到屋月已屋頭生

朱繼芳

客路

閨閣空相憶那知客路艱背人前去鳥迎面遠來山夜  
泊孤燈悄晨裝片月彎猿聲不知處杳杳白雲間

薛嵎

天育道中

除將吟卷引琴與鶴相隨問寺路猶遠入山僧未知鳥  
靈巢佛塔猿飲挂藤枝陵谷幾遷變道傍橫古碑

黃幼張

過臨平

孤踪逐浪萍幾度過臨平人語水相應帆移山倒行鷺  
飛秋嶼冷虹飲晚川明不是憑詩句丹青寫不成

陳深

姑蘇臺晚眺分得高字

殘陽古城曲岌岌崇臺高不知何年創尚爾結構牢青  
山擁危楯白水環空濠美哉此山谿慘淡悲雄豪當代  
一戰霸意氣何矜驕蛾眉坐傾城忠魂隨怒潮空餘故  
宮苑寒雀飛野蒿佳辰晤良友清眺舒煩勞夕風振叢  
薄鴻雁中天號永懷五湖客一舸凌雲濤浩歌滄浪詞  
願言從遊遨

李元應



折楊柳

東風來何時  
百花已飄零  
獨有堤上柳  
慘淡含春榮  
扁舟復何適  
延客江上亭  
顧無青玉案  
何以送子行  
攀條欲相贈  
上有雙流鶯  
流鶯正求友  
奈此離別情

黃簡

招荆江蕩子

衝風逐飛雲  
庭葉紛墮槁  
蕩子久不歸  
佳人坐中老  
蕭蕭楚山晚  
湛湛江水流  
經從望夫石  
那得不回頭

黃文雷

晚立

獨遊得荒谿晚意與心會  
水聲遠終聞山色靜可對鳥  
語林塘邊犬吠籬落外柴門未須關月在東峰背

杜旃

綠珠行

蜀絲殷空金作谷珊瑚成林珠百斛  
彼姝千花萬花簇  
明月出胎照波綠鏡中飛鸞掌中身  
夜月春風看不足

悲歡倚伏儵禍福西里憐顰東市戮願將舊意奉新人  
此別它生定難卜君因妾死莫多怨妾死君前君眼見  
高樓直下如海深碧玉一碎沙中沈平時感君愛妾貌  
今日令君知妾心

葉茵

漁家行

湖濱江滸疎疎村村村漁家人子孫為魚不管風波惡  
出未天明歸黃昏得來魚可數妻兒相對語甕頭有蘆

熟鍋中無米煮昔日魚多江湖寬今日江湖半屬官釣  
筒釣車漫百尺團圞帆罟空多般蓋簑臘雪楊柳岸籠  
手西風蘆荻灘嗟嗟蚱蜢千百隻盡向其中仰衣食幾  
謀脫離江湖歸犁鋤似聞歲惡農家尤費力

促織

壁間吟不待秋時吟苦中宵動客悲勸汝不須催婦織  
家家五月賣新絲

張翰

膾鱸元不動歸思拂袖西風已見幾江上如今來往客  
但言鱸膾不言歸

去去

去去扁舟對晚暉晴和直欲減綿衣風來一陣蘆花過  
祇道春殘柳絮飛

汪莘

開禧元年十二月遷居柳溪上其夜大雪蓋宰來  
訪

茅屋凍將壓柴扉寒不開交朋幾竿竹兄弟數枝梅渡  
口月初出沙頭人正迴客居殊自在歲事亦相催

徐作

開庵

藜莧幽人室丘園隱者居一原青嶂合萬木綠陰疎手  
把歸田賦腰縣種樹書桑麻連畛秀網罟入溪漁

何偁

贈王居士三首

多羨王居士心閒事事幽山從天末見江近枕邊流春  
園千葩秀霜林百果收更能窮物理濠上看魚遊

地占松江勝為園不種瓜幽深清磬響高下石欄斜花  
蜜蜂隨蝶林深雀啁蛇勝如摩詰畫不是季鷹家

霜落川原淡風高木葉丹雲垂千頃白月墮一江寒禮  
佛因成塔焚香旋築壇竹聲過小院雜珮響珊珊

奇童二人

李獻可

吉水人年數歲孝宗召入宮中面試一  
詩立就帝嘉數不已曰何不作我家兒

宮女午睡應制

御手指嬋娟青春白晝眠粉勻香汗濕鬢壓翠雲偏柳  
妬眉間綠桃憎臉上鮮夢魂何處是應繞帝王邊

曾澈

盱江人眉目疎朗出語必援古今括蒼鮑輓遇諸  
江右驚問之乃逆旅主人子明年訪之死矣僅得  
遺詩一首於家

九齡行



我生九齡氣食牛喑鳴頓挫無匹儔白雲無根起天末  
一生萬事同悠悠低頭拱手事先覺談笑未了成怨讐  
一譽不足勝百毀言語起滅如浮漚聖賢可與知者道  
麟鳳豈在山中遊遽然夢覺大槐國江花昨夜生涼秋  
焯有孫文鑑字鹿書幼稟竒慧生三歲能辨四聲七  
歲為詩多警句尤工制舉義出應小試輒冠儕偶鄉  
里呼以神童顧嗜學太勤每置食飲几案間當抽思  
正苦忘其寒溫過時進之失度愆和釀成痞疾竟以

蚤天有遺詩百首其兄弟錄為小帙將授梓人偶讀  
曾童子九齡行追憶此孫有病魔篇亦十許歲時作  
悲咽酸辛情事何甚相類也嗚呼才人無命豈獨子  
安長吉留恨天壤哉附見於此用誌祝子之痛

病魔篇

時年十二

清童子陳文鑑

有一病書生生長在桐邑自度非凡人無端被魔繫  
住世幾何年春秋纔過十太丘之耳孫行二又行一  
名字母勞問生死尚莫測旦暮長幽憂被魔勢方劇

念我毀齒初就塾延師益父指為黃童祖目為李泌  
豈知命不猶耽思恒廢食踰時或加餐寒溫非所擇  
浸淫脾胃間久之成痞積驅痞亦何難只因魔作孽  
茲魔幻萬狀覩縷未易悉人生五臟全榮衛本堅實  
魔能抵其熾竭來據胸臆初發痛有期為期定酉戌  
厥後苦纏綿不分日與夕魔形大似拳魔氣通於膝  
髣髴物作聲衝喉半含咽行則聲呱呱坐則聲唧唧  
乙筋握漸稀痛楚百端集家君覓良醫救療意惶迫

但得魔驅除酬金誓勿惜醫聞接踵來拍脾云痼疾  
攻補合兼施及時不可失就之詢醫方稜術並巴戟  
纔餌遭魔怒奮起與藥敵消滴強入喉觸忤致嘔溢  
魔似膠漆黏不受百草汁元精日銷磨刀圭徒浪擲  
匍匐叩醫門醫言須改策藥貴力乃專復附效什伯  
但服更勿疑服久魔自戢咬咀動盈把烹煎各如式  
豈惟不中魔魔意翻自得液甘魔平分味厚魔竊吸  
金盡藥亦殫魔肥人愈瘠撐席骨稜稜無風寒慄慄

復有後醫至相看勸勿急治此有祕傳庸師安得識  
岐黃八法鍼其經著甲乙任督與帶維隨症按腧穴  
投之得所宜癥瘕無不挾唯唯姑試之銀絲瑩如雪  
手撫入肌膚初無血痕漬漸刺疼莫勝鋒攢等蠱蠅  
洞穴非不深魔則已旁匿良久引鍼出衆患仍交作  
薰蒸雜艾納用助鍼芒力鍼灸既迭加魔損未毫末  
痛哭向魔陳君豈夙世業得非駘沈儔來宅我肝膈  
有罪應容湔有怨亦堪釋况係他生讐忍向童稚結

願悉毀藥囊從君丐陰騭楮鏹千百焚牲醴三日設  
束茅為君車裁筵為君櫺求君暫捨予逍遙信所適  
貸以一息安寔報在萬劫灑血託青詞下書年月日  
羽士二人

黃希旦

字姬仲邵武人生仁宗景祐二年幼穎拔能文章  
長而好道禮道士吳惟靖為師盡得其服氣還丹  
之訣外不立異好事者喜從之遊酣詠自得人皆  
莫知其所以異也熙寧十年蛻去後有遇諸蜀者  
和賈鴻舉移竹

琳房珠館何虛寂  
寶砌無塵苔蘚碧  
仙翁倚檻靜吟哦  
却憶簷簷拂巖石  
勁節虛心守歲寒  
未嘗暫變風霜色  
移來迢遞不辭勞  
深根訝向瑤臺植  
漸承春意葉青青  
時惹天香烟幕幕  
月籠翠影尚蕭疎  
露被繁枝纔滴瀝  
迎風閒夜擬龍吟  
結實他年期鳳食  
非才終約老烟霞  
此際謬當親採擇  
寄言紅紫莫相猜  
彼此無情蒙化力  
逢時剪拂任他人  
沈去葛陂都咫尺

性慵

性慵人事拙思向遠山居欲得是非少先宜來往疎善  
鄰惟水竹良友祇琴書冷淡生涯外逍遙一室虛

春日書懷

二月又將半閒居興若何芳菲殊未賞泥濘阻相過華  
砌饒苔蘚柴門長薜蘿韶顏須自惜隨分樂天和

采藥

采藥山中去扳躋不覺賒深源無俗迹滿地是靈芽巖  
迥陰留雪溪澄淨見沙可憐名利客應笑此生涯



水心亭

為愛方池淨危亭此構新  
寒光搖玉鑑晴色戲金鱗  
月上驪宮曉蓮開水府春  
主人能息慮四座絕風塵

詠竹

生涯何所有滿砌植琳琅  
瘦影碎秋月健梢橫曉霜  
且從喧鳥雀終待集鸞皇  
吟遶都忘却誰知此興長

寄贈寶幢修山主

瑤幢真勝槩晦迹一禪翁  
語默呈心印縱橫振祖風  
晝

閒人事外夜靜月華中若問春來意松青百卉紅

竹洞

竹洞新開碧玉林徑幽疑入五華深夜篩明月一天靜  
晝擁青雲四座陰剪杖佇看雷雨化迎風時聽鳳皇吟  
烟霞不用重關閉塵俗誰能此訪尋

謝人惠星冠

學道多年尚屈蟠豈勝仙伯贈我冠曉簪乍覺星攢頂  
夜戴偏宜月滿壇對鑑寧煩朋友正避時羞為利名彈

預思他日雲林下輕罩紗巾鶴髮寒

讀方干詩

數篇騷雅名雖遠三拜逢迎禮過差補得唇來身已老  
灌園何苦更咨嗟

葛長庚

字白叟福之閩清人七歲能詩賦背誦九經父亡  
母改適長庚遂從陳泥丸學道號海瓊子至雷州  
繼白氏又改姓白名玉蟾自受陳泥丸仙訣披髮  
佯狂徧走名山四方求詩文者戶屨常滿紹興壬  
午伏闕上書言天下事沮不得達因醉執逮京尹  
一宿乃釋是年十月至臨江軍飲慧月寺之江月

亭忽躍身江流中諸從遊者急命舟援之長庚出水面搖手揮去而沒洪都之人皆謂已水解矣未幾見于融州又見于隴蜀云

長歌

厥初由閭閻吾志在林泉為舜不無地希顏儘有天魚虫猶可佛雞犬皆登仙顧我非碌碌荷天良拳拳幼時氣宇壯長日文彩鮮琴劒微暖席江湖動經年異乎三子撰契彼五家禪既已出洙泗從而師倥傯肩依洪崖右道在靈運前所得既天祕與交又國賢可圖大藥資

以辦買山錢東訪鼎湖浪西尋蒼梧煙一寸百煉剛半  
生雙行纏簪紳非吾欲魚鳥從所便逸興五湖濶虛名  
四海傳飽餐青精飯細讀黃石編頃自七閩出放馬迷  
市塵紅塵刺人眼名利交相煎富貴已嘗鼎雲霄當著  
鞭蹉跎度青春遲暮即華顛光景亦倏忽物華隨變遷  
仰天時一笑顧影長自憐紫府何冥邈青鸞何沈綿蓬  
萊雲渺渺小有月娟娟策足青霞路收功黃芽鉛飄然  
復何往此去如蛻蟬

秋霄辭二首

仰觀銀河月千林散寒光佳人今何之遠在天一方秋  
聲酸我鼻秋色斷我腸夜深倚西風清淚如雨霑世有  
千里馬可憐無王良

孤月明秋空清影跨洞門彼美嬋娟姿的是姮娥魂淒  
然到書帙惘然入酒樽不歸廣寒家夜遊天子園無人  
知此懷驚烟籠啼損

述古二首

帝子御飛龍鼎湖呌奚為玉京鬱崔嵬銀河汎渺瀰俯  
首視紅塵萬蟻紛何知乘雲遊八極手翫珊瑚枝湯武  
事干戈此事矧肯期但聞穆天子八駿會瑤池

河水一鏡清中有驪龍舞波心呈寶圖始脈造化祖燧  
人鑽炎涼炎帝餌甘苦身披獠狨衣口服穀鯀乳此時  
至尊者帝階三尺土羸政築阿房錢鏗繞偃僂

栖霞

冷煙纏山腰暗水冽石骨欲風松先鳴未雨苔已滑洞

前多琪花洞裏多紫霞高人得所栖日永蒸胡麻

樓前雨霽

飛廉驅鐵騎萬雨飛落地烟淡松自蒼風起竹似醉倚  
窓橫膝琴政有作詩意白鳥忽飛來點破一山翠

戴月遊西林

悄然無人聲但有一杯月誰家鳴乳虬萬籟靜不發蒼  
鬚指前路滿地鋪翠樾清露滴秋衾夜氣飛霏屑遙岑  
有無中烟渺天空濶劍光衝斗牛長嘯蒼崖裂山行二



三里詩腸思酒渴冷雲曳山腰暗水洗石骨勒馬過斷  
橋枯木冷欲折枝頭驚鳥鵲草根鳴蟋蟀試問夜如何  
孤猿啼不歇柴門自推敲殘燈更明滅

鶴林賞蓮

玉洞生翠霧瑤林暎素霞天飛明月英夜浴白蓮花碧  
水香以淨松聲吹露華衆仙鸞鶴散寂寂五雲家

步虛

清都五雲天天中飛紫瓊上皆青琳府中有白玉京風

露淒且冷蕊宮雲冥冥玉童折珊瑚下弄銀河星

贈郭承務蘆鴈

畫士郭熙畫之冠郭熙去後名未斷其裔復有郭萬里  
胸中丹青飽無限為誰作此蘆鴈圖傑出南齊宇文煥  
烟水瀟瀟風捲蘆沙邊鴻鴈暮相呼瀟瀟洞庭此秋景  
世間此畫知有無幻出棲鴈三四隻八九葉蘆橫古磧  
欲宿未宿嘹淚聲漁舟泊岸山烟黑秋風吹落梧葉黃  
過鴈往往歸衡陽橫空書字人不識飛過有影沈滄浪

落霞浸水江村暮數隻翱翔回古渡引領舉喙啄荷花  
飛越戍樓西畔去雲寒月淡西塞秋幾聲淒切惹人愁  
胡東原香錦亭

東皇剖破勾芒腹錦心繡腸香馥郁絳都風雨儼慙春  
花魂無主自精神黃鸝初喚柳開眼海棠枝上春煙暖  
放出一點兩點紅牆頭紅腮微笑風東原去後花無主  
春工亦懶施機杼亭前忽遇詩酒仙花亦噴出香龍涎  
風催雨趙花不辨滿庭芬芳生爛漫牡丹吐火花欲然

日將錦繡鋪苔瓊詩狂夢與花神飲酒醉不與花神寢  
酒闌令我憶東原花木雖在人惻然此詩終不為花作  
惆悵東原此丘壑而今賞花不見人但見蜂蝶飛間亭

問月臺蘇竹莊同賦

千山萬山翠交鎖何處瑤臺天上墮臺前吟久忽登樓  
樓前開窓天入座留天且莫放天歸問天明月來幾時  
青天推月上雲表使我對月自問之試問月中玉妃子  
人言羿妻無乃是夜夜清風為作媒欲把冰姿嫁誰氏

桂子婆娑今幾秋  
藥宮珠殿何年修  
吳剛執斧胡不休  
玉兔銀蟾猶更留  
我聞明皇排空聽天樂  
又聞李白騎鯨水中捉  
至今天上弄銀盤  
依舊萬星攢碧落  
但見一輪月在天  
如何千江千月圓  
月還似水水似月  
千眼所見皆同然  
今方得月為詩侶  
月亦有情但無語  
延月不久月竟歸  
我欲乘風遊玉宇

行路難寄紫元

贈君以丹棘忘憂之草  
青棠合歡之花  
馬瑤遊仙之夢

枕龍綵辟寒之寶砂  
天河未翻月未落  
夜長如年引春酌  
古人安在空城郭  
今夕不飲何時樂

茶歌

柳眼偷看梅花飛  
百花頭上東風吹  
壑源春到不知時  
霹靂一聲驚曉枝  
枝頭未敢展鎗旗  
吐玉綴金先獻奇  
雀舌含春不解語  
只有曉露晨烟知  
帶露和烟摘歸去  
蒸來細搗幾千杵  
捏作月團三百片  
火候調勻文與武  
碾邊飛絮捲玉塵  
磨下落珠散金縷  
首山黃銅鑄小鐺

活火新泉自烹煮蠨眼已沒魚眼浮颼颼松聲送風雨  
定州紅玉琢花甕瑞雪滿甌浮白乳綠雲入口生香風  
滿口蘭芷香無窮兩腋颼颼毛竅通洗盡枯腸萬事空  
君不見孟諫議送茶驚起盧仝睡又不見白居易餽茶  
喚醒禹錫醉陸羽作茶經曹暉作茶銘文正范公對茶  
笑紗帽籠頭煎石銚素虛見雨如丹砂點作滿盤菖蒲  
花東坡深得煎水法酒闌往往覓一呷趙州夢裏見南  
泉愛結焚香淪茗緣吾儕烹茶有滋味華池神水先調

試丹田一畝自栽培金翁姪女採歸來天爐地鼎依時  
節煉作黃芽烹白雪味如甘露勝醍醐服之頓覺沈疴  
甦身輕便欲登天衢不知天上有茶無

聽趙高士彈琴

我尋屏跡到猿啼雲滿山前花滿溪高峯壁立七十二  
風生兩腋天可梯煉師兩鬢東風黑紺天不流月光白  
簷牙咬雨昨已晴松幄長空夜瑟瑟興濃抱石玄以輕  
得意七絃橫玉繩膝頭拍弄響玲玲燦然奪目三十星



初如雨滴芭蕉夜久坐梧桐猿嘯罷宛然幽澗聽鳴泉  
偶雜脩篁夏清夏先疑易水渡荆軻已轉似勸無渡河  
美人金帳別項籍壯士鐵笛吹孟婆不然雙雉兩南北  
或者婦牽蘇武服絃中何以湘妃怨指下為甚明妃哭  
又非林下感蠨蛸更匪邊笳叫晚秋自然鴈聲下遙塞  
忽覺蟬噪過南樓君休彈終我畏聽滿懷今古興亡病  
蒼梧雲愁虞舜遠鼎湖雲出軒轅冷一聲一聲復一聲  
不管世間銀髮生彈盡天涯夕陽影又向山中彈月明

胡長卿去已久韓飛瓊無此手玉帝聞未曾人間空白  
首柳花霏霏滿江城城外海棠紅淚傾恐君餘思更未  
已為我春晝鳴晴鶯

贈蓬壺丁仙人琴

瓠巴騎鯨上天去伯牙成連亦千古淺世斷無鍾子期  
絃中妙意為誰舉春風春雨滿瀟湘人在蓬窓閑竹房  
竹裏鶻啼喉舌冷花間鶯宿夢魂香客從澧沅下衡岳  
滿懷詩愁何處著請君拂去水晶塵淪茗一了撫然作

道人問予若為情伊絃淒兮余莫聽一春十病九困酒  
三月都無二日晴俛首沈吟聲一曲吟徂一罷撚撥續  
初如雪泉嗽鳴玉已轉忽如雨簌簌于中亦有蟠蛸鳴  
儵忽變作冷猿聲始疑荆軻渡易水乃是湘妃夜涕零  
昔從撫斷南風了羗里幽人始能曉可嘆壇中苦杏花  
山高水寒即聲杳道人此意非人間笑詠洞章鏘佩環  
能令舞鳳下丹漢雲裏大地垂頭看世間雞蟲互得失  
只好牧羊坐化石何為兒女謾呢呢候蛩時鳴徒戚戚

輸君朝朝在翠微鶴已睡去人不知笑思古今一俯仰  
彈到千山月落時君知否梧桐枝上雙燕語盡將萬事  
等風絮琴中日月何脩閒肯使事逐孤鴻度

有贈

我見千家鬧管絃金瓶玉水養春妍一朝花落空枝在  
爨下焦枯亦可憐曾聞李白之詩否以色事人幾長久  
斷藥殘英尚未衰月明人立黃昏柳

筆架山

吾是瑤臺翰墨仙  
操觚弄槧玉皇前  
翻雲為墨海為硯  
一片寒空如雪殘  
兔毫象管用不得  
倒蘸崑崙醉鈎畫  
當年染罷八角芒  
金闕上章求放逸  
三峯坐斷江南天  
臨汝城頭蒼蒼然  
狀如筆架翠起伏  
與吾閣筆勦勦眠  
山靈驚呼猿鳥亂  
清魂復被風吹散  
起來叫問山前人  
幾度松枯白石爛

白雲庵

宿霧戀喬木  
落花粘瘦枝  
鳥聲人靜處  
山色雨來時  
霽

月成相約涼風解見知僧房安一枕海氣濯冰肌

順昌即事

筆下千機錦胸中一滴金乾坤春甕潤風月夜樓深世  
絕夫君操人誰梁父吟只尋雲外路誰復聽寒砧

五更解醒梅竹之間徘徊體

宿鳥能傳語殘風且點心山情憐淡坐月色笑孤斟驚  
我梅花睡聞他竹葉吟清歸無所得得句貴如金

博羅縣驛

虎嘯月生海猿啼風撼山夢回三鼓盡身自九天還雲  
氣浮窓外泉聲入枕間問心宜富貴為復要清閒

景泰晚眺

海岸孤絕處晴沙露遠汀潮花人鬢白山色佛頭青夕  
照雌黃筆秋烟水墨屏天空杉月冷鶴夢幾回醒

溫學士再訪山中

炎帝辭朱節清晨立素秋借緋皆木葉脫白滿林丘流  
水高山興疎風冷雨愁詩人應自樂歌笑海東州

紅梅

人賦紅梅少子詩為補遺霞融姑射面酒沁壽陽肌太  
潔遭時妬獨醒為衆疑漫隨春色媚自保歲寒姿

春日道中

洞口鳥呼鳥山頭花戴花風篁蒼韻玉烟樹晚籠紗懷  
白一樽酒邀盧七椀茶春光索彈壓萬象曉排衙

梅牕

南窓屋數楹一點陽和生枝上雪粧瘦牆頭風作清霜



天酒自煖夜月夢難成何處人吹笛黃昏送幾聲

赤壁

不說江山笑老權盡稱造化戲曹瞞飛鳥遶樹孤回首  
斷戟沈沙怒激湍豪傑已隨霜葉盡興亡儘付浪花翻  
畫堂莫唱坡仙賦戰骨草中吟夜寒

泛舟黃鵠歸廬山

清風為我送歸船數粒青松起薄烟帆影驚飛秋水鴈  
櫓聲攪斷夕陽蟬幾人家在溪頭岼一片雲生水底天

滿眼良朋無好酒此心已挂九江邊

留別鐵柱宮葉法師

不嫌來往日詩筒春興無窮我欲東一雨放行三尺水  
萬松回納半帆風且將南浦難題景寄在西山絕頂峰  
柳處酒家花處寺併留他日款遊從

悠然堂

一池寒碧浸紅鱗芍藥方花春後春烟閣曉垂天幕靜  
風簾夜上月鉤新閒雲流水無窮意絳闕清都被謫身

不向悠然堂上飲篇詩斗酒付何人

題甕齋

萬軸牙籤聚碧芸數間茅屋鎖閒雲鶯吟芍藥一歌女  
蟻遶菖蒲萬水軍香穗橫窓盤瘦影茗花浮碗鬪清芬  
琴心三疊晝眠覺熟讀數篇韓柳文

題平江府靈巖寺

萬松挾嶺壯招提上有琴臺與墨池佛殿尚存今智積  
娃宮曾館古西施太湖遠水如奩鏡木瀆平田似局棋

策杖訪回無際塔日晡聊看草書碑

次韻東坡蒲澗寺

蒲山紅白福桑花蒲澗深中儘可家  
景泰得泉從卓錫安期種棗說成瓜  
豈無仙化羊如石尚有書蹤壁似鴟  
一飯招提共僧語法華經裏問牛車

秋日有懷

一點秋光寄畫圖秋來吟鬢似楓疎  
晴烟染樹看何足缺月梳雲狀不如  
暑退涼生蟬有語水長天遠鴈無書

此心直欲鵬南舉不學蜘蛛結網居

柳塘送春

急雨將雷過柳塘春因底事亦歸忙  
經時不放荷花葉昨夜盡收  
梔子香判斷千林成夢去安排  
一夏納風涼開筍無覓愁來處  
數筆晴雲盡水鄉

寄桂隱

指點篇書說向誰武侯之後獨公奇  
許瓢却大堯天小嚴瀨應高漢座卑  
夙世已酬霖雨債我身今結水雲知

何人桂樹中間隱莫作南陽一睡驪

草亭偶書

賦罷清都白玉樓不知何事復闌浮  
琴彈十二欄干月酒洗三千世界秋  
絳闕瑤臺知有路空青水碧若為求  
紫皇早晚憐孤憤背土凌虛上去休

夢中作

醉醒曳杖訪松關正在黃昏杳靄間  
既去復來秋後暑似無還有雨中山  
澗邊幾葉晚花落天際一鉤明月彎

自覺餘煙埋屐齒行行印破蘚痕斑

呈沈同知

三面俱江一面湖古今畫作水晶圖  
門臨車馬紅塵路身在冰霜碧玉壺  
何道兩山俱翠紫雲苔二水合清污  
岸頭笑與黃冠語為問東林沈在無

乞紙寄諸葛桂隱

翰墨膏肓二十年纔親筆硯便垂涎  
東陽魚卵寒霜幅嵎縣溪藤妙雪牋  
一日禿除千兔穎霎時磨盡萬松煙

洛陽市上今無價直欲昂頭寫碧天

燕巖遊罷與巖主話別


西風吹作此巖遊滿目松筠翠欲流  
玉燕不飛明月夜石鐘一振曉霜秋  
惜乎分水便南北忽爾回頭欲去留  
且向人間辦丹料却來山頂結茆休

題上清法堂壁

秋雨縣天風作寒冷煙鎖住屋頭山  
半巖飛鳥一聲過峭壁斷雲千古間  
世俗不知幽靜處神仙隱在有無間



夜來小艇篙脫手醉把霜筇入翠灣



宋元詩會卷五十七

欽定四庫全書

集部

宋元詩會卷五十八

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣王鍾泰

謄錄舉人臣龐兆懋

欽定四庫全書

宋元詩會卷五十八

兵部主事陳焯編

衲子四人

惠崇

宋初人工繪事宋子京有過其舊居追悼之作蘇黃集內題詠屢見而詩話中則云崇於詩句慣襲唐人如河分岡勢春入曉痕之類是也然其佳處自不可掩

池上鷺用明字

雨歇方塘溢遲回不復驚曝翎沙日暖引步島風清照  
水千尋迥棲烟一點明主人池上鳳見爾憶蓬瀛

贈文兆

偶依京寺住誰復得相尋獨鶴窺朝講鄰僧聽夜琴注  
瓶沙井遠鳴磬雪房深久與松蘿別空縣王屋心

訪楊雲卿淮上別墅

地近得頻到相攜向野亭河分岡勢斷春入燒痕青望  
久人收釣吟餘鶴振翎不愁歸路晚明月上前汀

宇昭

與魏仲先同時其詩澹雅  
清醇亦頗得魏之風致

曉發山居

蓐食小人家寒燈碎落花鷄鳴窓半曉路暗月西斜  
世故欺懷抱風霜老歲華劇憐詩思苦悽惻向長沙

贈魏野

別業惟栽竹多閒亦好奇試泉尋寺遠買鶴到家遲  
藥就全貽母詩高祇教兒未能終住此共有海山期

塞上贈王太尉

飛將是嫖姚行營已近遼河水堅度馬塞雪密藏鵬敗  
壘殘旗在全軍列帳遙傳呼更號令今夜取天驕

寄題武當郡守吏隱亭

郡亭傳吏隱間自使君心卷幕知來客縣燈見宿禽茶  
烟逢石斷棋響入花深會逐南帆便乘秋寄此吟

留題承旨宋侍郎林亭

翰苑營嘉致到來山意深會茶多野客啼竹半沙禽雪

溜縣危石旗燈射遠林言詩素非苦虛答侍臣心

寄保暹師

吟會失秋期荒山寄病時客髭生白早叢木落青遲渴  
狄窺莎井陰蟲占菊籬歸心何以見霜月下天涯

幽居即事

掃苔人迹外漸老喜深藏路僻閒行遠春晴晝睡長餘  
花留暮蝶幽草戀殘陽盡日空林下孤禪念石霜

道潛



道號參寥於潛人哲宗賜名妙總大師蘇軾守杭  
日卜智果道院居之又為作參寥泉銘嘗稱其詩

無一點蔬笋氣體  
製類儲光義云

廬山雜興六首

古帝論匡山南國之德鎮爾來得躋攀此語始吾信雄  
雄壓九江矗矗排萬刃青天落飛瀑白日雷霆震石鏡  
俄忽開孤光舞而運異花無冬春瑤草亦芳潤遠公初  
渡江道譽藹東晉劉雷贊高風遊世各無悶陳迹虎溪  
頭予今誰與訊

衆峰勢連環萬疊不可窮  
香爐獨秀拔佳氣常蔥蔥  
長風卷遊霧曉壁開瞳矐  
招提出其下樓觀排青紅  
回眸盼五老刻削金芙蓉  
宜哉謫仙子愛此巢雲松

山南信美矣山北尤增奇  
春風錦繡谷紅素自相依  
梯空上絕巘雲日驚倒窺  
崖壁暈祥光五色成玻瓈  
旁通大林寺松竹短且歌  
樂天當日遊四月桃始披  
餘齡願寄此永與人世違

龍湫亘三峽草木皆森森  
奇禪餘得支徑別塢行遙  
迤上

人吳門秀邈有方外姿芒屨襯兩足策策欣相追秋田  
罷刈獲雲木明空陂雙雙林中禽文彩光陸離雍容事  
飲啄相顧忘驚飛鮮飈忽騰馥岳桂飄葳蕤峰端卧落  
日眷此忘還期

霜清玉繩曉澗谷風未號澄潭不可極俛盼驚骨毛豈  
不有神物于茲能遁逃海日射兩崖餘輝何昭昭游鱗  
出岸穴翻覆如銀刀偶來殊不惡勝事俄所遭聊為五  
字詠遠愧謝與陶

高巖吐奇雲，倏忽千萬丈。援毫欲名貌，卷縮非一狀。飛仙或遨遊，隱隱出其上。驚飈忽吹滅，轉盼惟清嶂。山中勝事多，彼俗誰能亮。

秋日西園

秋山夜來雨，雲氣朝尚昏。禪庭無來轍，但見落葉繁。石室暗燈火，天容開霽痕。耳目思遠適，曠然啓層軒。長謠緩輕策，去去窮深源。方塘灑清流，鳬鴈靜不諠。時遭羲皇翁，容與諧笑言。邈然採真賞，歲晏誰與論。

子瞻赴守湖州

少游與余同載因遊惠山覽唐處士王武陵竇羣朱宿詩追用其韻

各賦  
三首

山煙弄滅沒山木含蔥蒼  
刺舟傍遙岸理策升虛堂  
周遭屬曾巘矯矯如翺翔  
下瞰平田流淡然浮日光  
青簑解初籜洗雨聞清香  
雖云迫前途真賞豈易忘

松門暗朝雨寂歷無行人  
隆曦忽穿漏卉木蔚以新  
階泉瀨石齒照眼光磷磷  
使君美無度卓犖遺囂塵  
風標傲竹柏談笑凌穹昊  
是何愧沈冥子卧霞吞結璘

揚帆渡江來洗眼驚翠樾雲姿既容裔鳥哢更清絕凌  
梯訪前蹤琬琰亦未滅嗟我魚目光疇能綴明月狂墨  
掃琅玕風煙坐中發殊勝區中人茫茫走飛轍

和龍直夫秘校細雨 二首

細雨連阡陌輕雲濕不飛池寒鷗自卧巢冷燕催歸慘  
淡疑沈樹飄蕭忽近幃簷花霑已久稍欲墮人衣  
傍砌飄纔斷從風強更來斑斑泣蛛網浥浥汗江梅薄  
日光時漏層陰意未開少陵心易感詩句寫清哀

次韻秦太虛夜坐

古寺冬蕭瑟天寒色更冥捲幃延素月轉盼失流星  
爐底眠枯枿窓根立凍瓶談餘焚柏子一燧小煙清

廣陵城外野步呈莘老

林梢聒聒鳥聲繁積雪初消澗水渾老樹卧波寒影動  
野煙浮草夕陽昏風回笛響山前路犬吠人行竹外村  
杖屨不知幽興遠歸來新月在柴門

次韻朱伯叔主簿觀雪

朝來密雪蔽天涯坐目丘園發素華初著敗梧驚擁腫  
久霑庭竹見歌斜水精不動垂千筍雲母無聲落萬家  
安得層宮返收拾莫教狼藉渾泥沙

次韻姜伯輝朝奉宿九曲池

當時樓闕已桑麻陳迹何須置齒牙宛轉顏城圍綠野  
欽崙孤塔背明霞山雲度晚飛瓊葉海月生秋墮桂花  
圓嶠方壺同笑語終宵疑在水仙家

次韻子瞻飯別



鈴閣追隨半月強  
葵心菊腦厭甘涼  
身行異土老多病  
路憶故山秋易荒  
西去想難陪蜀芋  
南來應得共吳薑  
白雲出處元無定  
只恐從風入帝鄉

夜泊淮上復寄逢原

黃沙白草滿淮垠  
逆旅蕭條思不禁  
風約亂雲歸隴首  
角催明月出波心  
槎頭湧處潮初上  
斗柄移時夢未沈  
遙想故人投宿地  
畫船應在碧榆林

夏日龍井

二首呈辨才法師兼寄吳興蘓太守并秦少游少游時在越

翠樞高蘿結書陰  
驕陽無地迫吾身  
石崖細聽紅泉落  
林果初嘗碧柰新  
揮麈已欣從惠遠  
談經終恨少遺民  
何時暫著登山屐  
來岸烏紗漉酒巾

自憐多病畏炎曦  
長夏投蹤此最宜  
青石白沙含淺瀨  
碧梧蒼竹聒涼颼  
雲中雞犬聽難辨  
谷口漁樵問不知  
斑杖芒屨隨步遠  
歸來煙火認茅茨

游徑山懷司馬才仲

柔桑蔽野麥初齊  
布穀催耕雨一犁  
略約時橫溪上下

薔薇間發水東西重尋勝處追前賞無復斯人手共攜  
回首春風增感慨綿蠻黃鳥更悲啼

照閣奉陪辨才老師夜坐懷少游學士

援鳥投林已寂然芭蕉過雨小樓前雲依絕壁中間破  
月自遙峰缺處圓  
昭坐不須紅蠟炬  
可人唯有蕙爐煙  
校讐御府圖書客  
疇昔還同此夜禪

次韻東坡居士過嶺

一時遷客盡難堪  
二老高懷默自甘  
造物定知還嶺北

暮年寧許滯天南安排拄杖尋廬阜斗擲征衣洗瘴嵐  
他日相逢長夜語殘燈飛燼落毵毵

寄王晉卿都尉

主第耽耽冠北城位居侯伯固尊榮肯將踏月趨朝脚  
來伴穿雲渡水行池上紅蕖應漸老山中紫筍尚抽萌  
崧陽迤邐川原勝聞說它時卜釣耕

同韓子蒼遊黃山觀約高壽朋張公碩不至

駝裘躍馬去翩翩一舍逡巡箭脫絃仙事未須窮傳記

勝遊聊為好山川穿林絡石驚寒溜繚白縈青對篆煙  
惆悵能文二三子操觚安得共周旋

次韻才仲山行

幕府文書一掃空何妨行樂醉春風想聞笑語千山外  
正在烟雲萬疊中  
哢日鳥聲喧細碎照溪花影靜玲瓏  
苦吟只恐凋肝腎夫子還宜少黜聰

絕句

高巖有鳥不知名款語春風入戶庭  
百舌黃鸝方用事

汝音雖好復誰聽

秋江

赤葉楓林落酒旗  
白沙洲渚夕陽微  
數聲柔櫓蒼茫外  
何處江村人夜歸

江上秋夜

雨暗蒼江晚未晴  
井梧翻葉動秋聲  
樓頭夜半風吹斷  
月在浮雲淺處明

春晚

曉風池沼水瀾翻春盡淮南麥秀寒院落無人日亭午  
柳花如雪滿闌干

次韻少游學士送龔深之往金陵

虎踞龍盤亦漫雄城荒狐兔往來通可人唯有秦淮月  
出沒涓涓波浪中

子瞻席上令歌舞者求詩戲以此贈

多謝東山窈窕娘不將幽夢惱襄王禪心已作沾泥絮  
肯逐春風上下狂

與元規話別

湖水蒼茫四接天  
短篷孤榜自回旋  
想君東海東頭夢  
猶在汀洲白鳥邊

惠洪

字覺範江西新昌喻氏子又曰姓彭氏薙染之後  
以冒故牒責令還俗用張商英奏仍得為僧又以  
郭天信之請賜號寶覺圓明禪師及張郭得罪惠  
洪亦坐交結竄崖州未幾赦還建炎初示寂按  
宋史郭天信傳中稱僧德洪  
惠與惠字畫相近其誤宜也

雪霽謁景醇時方築堤捍水修湖山堂和韻



築堤蓋南堂雪霰響新瓦我踏雪泥至自攜雙不借愛  
公有俊氣句法洗凡馬清婉繼彭澤寒陋笑東野願為  
西崦鄰投名入詩社餘年吾事濟過從有公者何時聞  
折竹燈火共清夜

陪張廓然教授遊山分題得山字

先生如梁鴻德耀亦愛山湘西十日留笑語烟雲間弄  
泉石梅塢喚舟青蘋灣藉草飲松下松風當吹彈二妙  
生清妍山花挿雲鬟粲然起為壽舞袖相翩翩先生墮

憤醉頗覺天地寬  
醉語忽成詩為題  
蒼壁顏城郭遙相望  
但見千峰寒

送彥周

彥周美少年風味映前古  
令人每見之不敢發鄙語  
推墜吾法中偃蹇揖佛祖  
死生人所怖玩之于掌股  
此生幾離別此別覺酸楚  
夜寒衆峰高獨看霜月吐

謁狄梁公廟

九江浪粘天氣勢必東  
下萬山勒回之到此竟傾瀉如

公廷諍時一快那顧藉君看洗日光正色甚閒暇使唐  
不敢周誰復如公者古祠蒼烟根碧草上屋瓦我來春  
雨餘瞻歎香火罷一讀范公碑煩塵看犇馬斯文如貫  
珠字字光照夜整帆更遲留風正不忍挂

同彭淵才謁陶淵明祠讀崔鑒碑

晉室東渡後主弱祇如寄桓溫弄兵權劉裕竊神器先  
生于此時潔身良有以袖手歸去來詩眼飽山翠追還  
聖之清太虛絕塵滓長恨千載心斷絃掩流水

懷慧廓然

蕭蕭暑雨過空山成夜晴月出東南峰娟娟風露清飛  
螢自開合寒蟬亦悲鳴興來忽獨往聽此落澗聲永懷  
西湖上絕景玉壺明松際翛然姿振策自經行即欲呼  
就語忽隔千里程何時徑尋子夜航過臨平

同超然無塵飯柏林寺分題得柏字

沙村宿雨餘炊烟淡寒色山墟蠶市休野飯漁舟隔忽  
逢柳際門知有道人宅叩扉山答響童子出迎客空庭

竟何有凍死千歲柏鐘鳴食時至老僧揖就席香粳定  
宿春露葵應曉摘羞饑一飯美何啻萬錢直風軒納山  
翠引手捫石壁愛此玉崔嵬歲久自崩圯下有洄渦泉  
甘涼冰齒類勿輕一脈微去漲萬頃澤吾行無疾徐住  
佳去亦得欲收有聲畫絕景為摹刻興來勿復緩轉顧  
成陳迹

仁老以墨梅遠景見寄作此謝之

荒寒掃橫斜稀疏開未徧烟昏雨毛空標格終微見吳

姬風鬢亂睡色餘妬面誰令種性香風味極不淺道人  
三昧力幻出隨意現塞管玉纖寒無勞寫哀怨

居上人自雲居來訪明日告歸作此送之

浮雲山盡際花木迎春暉佳人殊方來見之消渴饑藉  
草坐松影粉香時落衣氣貌秀可掬出語超幽微巖壁  
鐘聲寂山陰花發稀去袂挽莫留又作甌峰歸

送通上人遊廬山

少年四方志一杖餘氎巾朝來過微雨扁舟買南津廬

山冠天下況復當青春遙知泊星渚雲開蒼翠新相看  
發一笑瀑布垂天紳虛漢清月上山空無四隣應懷千  
載姿坐榻空埋塵興來得好句錄寄北山人

奉陪王少監朝請遊南澗宿山寺步月

單衣喜和風詩眼愛空翠野亭亦脩然散坐聊倦倚坐  
久忽聞樵相視一笑喜那知深林外曲折見流水幽光  
弄紺碧春色潑秀氣去為千頃澤隄柳相嫵媚月光方  
下徹浮空見賴尾投礫戲驚之撲撲沙禽起歸途望林

壑烟靄隔山寺便如斜川遊歲月亦相似

觀山茶過回龍寺示邦基

北窓賞新晴睡美正清熟竹鷄斷幽夢朦朧不能續卧  
聞故人家山茶已出屋欣然一命駕妍暖快僮僕千朶  
鶴頂紅染此叢間綠坐客例能詩秀句抵金玉攜過回  
龍寺掃壁為君錄逸筆作波險歌斜不可讀坐驚殷牀  
鐘暮色眩雙目

同敦素沈宗師登鍾山酌一人泉



鐘山對吾戶春曉開烟鬟白雲峰頂泉紺碧生微瀾經  
年未一酌對客愧在顏兩翁亦超放瘦策容躋攀大千  
寄一瞬境靜情亦閒是時天慘愴佳處多遺刪立談共  
嘲謔豪氣破天慳臨川冰玉清風流繼東山孤坐巉絕  
處掉頭不肯還天風吹笑語響落千巖間歸來數清境  
但覺毛骨寒

宿宣妙寺

衝虎困頓歸投枕眠爛熳夜晴霜月苦睡美不知旦日

高披曉綠萬事付衰懶百年炊黍久強半得憂患起臨  
清淺流白髮不可揀此生終一壑形勝已入眼明年定  
來歸茅屋並崖瞰掩門無營為一味工寢飯

次韻道林會規方外

湘山半夜雨斷我西湖夢卧看讀書燈花作扶頭重曉  
窓晴潑眼倒挂聞么鳳起尋殿寒梅小立幽香噴柳絲  
不勝綰筓庭春脈動春色已如許樂事非一種平生所  
懷人忽此笑語共雲軒為誰停危坐山衲擁眼高空叢

林志大骨森聳開懷見赤心  
疊疊飽談誦坐客鶴腦側  
我亦快心孔袖中出新詩  
筆力發豪縱風日麗醇醖  
黃泥初揭甕舌根有滄海  
潮辯自掀湧何當橫枯藤  
齧鏃追兩本吾宗欲顛覆  
支者例闌茸君能為我起  
逸足王良控我詩如石田  
疏理終無用朝來強鉏耒  
禿筆時呵凍摩挲銅鑠腹  
博君一笑捧

贈蔡儒效

我家與君鄰屋居君昔未  
生先長我君髮齊眉我總  
角

竹居讀書供日課君誦盤庚如注瓶我讀孝經如轉磨  
長老奇君王佐才拭目顒顒觀長大十三環坐同賦詩  
出語已能驚怯懦風雷繞紙成千篇棄遺不惜如涕唾  
神思義表文融明清絕如珠肯受浣江左相傳紙價增  
東坡一讀無復和懷高識遠不可屈功成回首破甑墮  
家貧口衆難自安出圖斗粟充饑餓俄聞筆陣掃萬人  
上國英雄膽先破殿前作賦聲摩空盛名四海爭掀播  
華裾如蔥馬如龍九衢笑若流星過我經憂患早衰微

生怕虛名招實禍方衣童首住江村飽飯愛尋閒處卧  
睡餘信手摸書看會意起來行復坐林泉成趣亦題詩  
年來藁帙成堆垛仙郎開卷面發光誇我雄詞驚李賀  
相期他日同此遊先買鄰庵山數朶青松白石聞此言  
共作廬山二十箇

汪履道家觀所蓄煙雨蘆雁圖

西湖漠漠生烟雨浦浦圓沙鳬雁聚今日高堂素壁間  
忽見西湖最西浦翩翩兩雁方欲下數隻飄然掠波去

獨餘一隻方穩眠有夢不成亦驚顧蕭梢碧蘆秋葉赤  
青沙白石紛無數我本江湖不繫舟爾輩況亦江湖侶  
令人便欲尋審郎呼船深入龍山塢

李德修以烏蘭河石見示賦此還之

予友李德修少豪逸有美才工文章一時輩流推之  
聲譽著場屋紹聖初選于廣文至禮部好惡不合有  
司棄去遊邊往來蘭會甚久晚屏跡田園然視其氣  
貌精特功名一念未置也政和七年上元前四日過

予袖中出美石一掬大小二十八枚有紅青碧綠色  
細視之有旋螺紋如人指紋以誇予曰吾嘗與諸將  
至古烏蘭大河河中有洲鄰夏國此石得於大河洲  
中其為我賦之予為大笑曰君同時輩流皆踐清華  
為顯仕躍馬食肉久矣獨從予山中食脫粟玩朽石  
不亦大迂濶哉然德修頗非予言為作詩以還其石  
烏蘭洲塞夏國口大河天來箭激溜排空但聞地喘吼  
勢撞石壁欲穿透石堅捍之不肯受擲雷濺雪喧夜晝

千年石骨亦不朽碎為青紅雜怪醜疆場久空爛甲冑  
舉觴天子千萬壽李侯橫槊千騎後望雲賦詩劒礙肘  
徐涉河流馬俯齕下馬得之等瓊玖萬里來歸亦何有  
出以示我為拊手笑君兒嬉忘白首李侯氣如春在柳  
大河西國置懷袖君徒自珍世不售敲門那能易升斗  
功名偶然夢豈久道人乃爾自薄厚此石笑汝汝慚否  
南昌重會汪彥章

彥章退然才中人譏訶唾笑皆奇偉看君落筆挾風雷



渙然行文風行水坐令前輩作九原子固精神老坡氣  
儒生寒酸不上眼此郎要是天下士嗟予生計等飛鳥  
翩翩吳頭復楚尾去年興發看京華笑傲清狂人背指  
君獨折簡坐致我迎門歡笑自契履舊聞牛鳴馬不仰  
女逐臭夫那有理今年黃花南浦岸忽然見君失聲喜  
僧房借榻營夜語燈火照人如夢寐懷中卿相且袖手  
翰墨風流聊戲耳行看上書苦塊中凜凜范公只君是  
福巖寺夢訪廓然於龍山路中見之

山高夜氣催煩暑竹風為作南軒雨夢隨柔櫓到西興  
艤舟步入龍山塢蕭蕭松下逢客郎問信遠來亦良苦  
覺來但記談笑歡不省歡時竟何語卧看篝燈一點明  
嶺海茫茫隔吳楚安得却如清夢中杖履追隨長爾汝

魯直弟穉川作屋峰頂名雲巢

只今海上青石牛曾卧天子黃金屋下看朱紫如堵牆  
上前諸公遭牴觸眼高四海鏡面空滯山歸來巾一幅  
慚愧君家小馮君自是河東真鸞鷟文章五色體自然

秋水精神出睂目人間不識但聞名水非醴泉石非玉  
江南一峯獨高寒時時笑語雲間宿弟兄出處兩相高  
故作雲巢對山谷

題李愬畫像

淮陰北面師廣武其氣便可吞項羽君得李祐不肯誅  
已知元濟在掌股羊公德化行悍夫卧鼓不戰良驕吳  
公方沈鷺諸將底早笑元濟無頭顱雪中行師等兒戲  
夜取蔡州藏袖裏遠人信宿猶未知大顛西平擊朱泚

神駒行

沙丘牝黃馬已死俗馬千年不能嗣忽生此馬世上行  
神駿直是沙丘子紫燄爭光夾鏡眸轉顧略前批竹耳  
雪蹄卓立尾蕭梢天骨權奇生已似綠絲絡頭沫流紫  
繡帕搭鞍初結尾決驟意態欲騰驤奔逸長鳴抹千里  
贈許邦基

邦基今年方十九美如濯濯春月柳龍章鳳姿絕世無  
金馬玉堂如故有酒闌愛捉玉麈尾玉色正同批誥手

高燒銀燭照新妝看君落筆龍蛇走欲驅清景入秀句  
萬象奔趨不敢後人疑錦繡纏肺腸不然筆端應有口  
謫仙風流今復見況亦髣髴外塵垢但恐功名纏縛人  
未放青山挂窓牖

謝安道花壇

三月江南春不淺謝家池上開花苑層壇迸破碧瑠璃  
嫩蘂簇成紅婉孌一枝兩枝和霧白素娥月下逢姑射  
十朶五朶照水紅仙姝並立瑤池東人生遇景須行樂

莫使餘香散簾幕白雲難逃鬢上斑金尊且對花前酌  
時人莫以花為浼大都自是人情改若使人情長似花  
相看顏色年年在

夏日西園

晚庭一霎過暑雨高林相應山蟬鳴南窓夢斷意索寞  
牀頭書卷空縱橫蔬畦日涉已成趣起來扶杖園中行  
葵英豆莢小堪摘矮榆高柳陰初成野禽啄果時落地  
池塘蓋水新荷平歸來西屋斜陽在原舍尚聞春簫聲

自豫章至南山月下望匡廬

扁舟秋晚離南浦，片席搖風望星渚。  
揚瀾大浪晴泊天，南山窈窕開蓮宇。  
倒檣散策一登臨，便擬掩關深處住。  
吾生飽食隨東南，去亦無求住無取。  
江山得意且題詩，從遊況復皆真侶。  
青燈灼灼夜窓深，對窓卧聽風甌語。  
隔岸廬山金碧開，月明尚記曾遊處。

贈王敷素蕪簡正平

空山無人舟壑移，坐看香燒行篆畦。  
兄弟華軒肯過我，

墮甌散帚生光輝著屐登山亦不惡攜被假宿良幽期  
燈前綠髮映玉頰風流未數崔宗之夜談詞辨出神駿  
絕塵赤兔真權奇我欲置君帥河朔軍前千騎紅妝隨  
橫槊吟詩氣慷慨玉帶錦袍英特姿又欲置君玉堂臥  
霧窓斐几春晝遲醉中草制驟風雨諸公堵立相嗟咨  
微吟擁鼻笑不語恐未免爾無多辭為君張燈掃東壁  
他日重來讀此詩

浙竹



龍孫初長浙江曲疎影蕭蕭濯寒玉平生知愛足風流  
只有山陰王子猷而今流落蒼崖頂暗換年光鄉路永  
冰敲雪壓未應衰鸞鳳不棲空故枝堅幹猶堪製長笛  
最合宮商勝金石為君吹動鏡湖秋驚起雙龍翼小舟  
郭祐之太尉試新龍團索詩

政和官焙雨前貢蒼壁密雲盤小鳳京華誰致建溪春  
睿思分賜君恩重綠楊院落春晝永碧砌飛花深一寸  
門下賓朋還畢集碾聲驚破南窓夢高情愛客手自試

春霧腳紫雪花湧我有僧中富貴緣此會風流真法供  
山寺早秋

千本蒼杉俱合抱夕陰相暎寒蟬噪殘僧獨歸清入畫  
秋色滿庭濃可掃霜鐘初歇月未生但覺篝燈一點明  
階除環珮走流水樓閣誦經童子聲

讀瑜伽論

此生已無累一席可窮年細嚼寶公飯飽叅彌勒禪懶  
修精進定愛作吉祥眠夜久山空寂唯聞繞砌泉

夜坐分題得廊字

一雨餞殘暑瘴疴蘇簟涼臥聞山果落起覺斜蘭香幌  
內水螢入堦除露葉光知誰愛清境步屨響脩廊

早行

失枕驚先起人家半夢中聞雞憑早晏占斗辨西東  
濕知行露衣單怯曉風秋陽弄光影忽吐半林紅

湘陰馬上和季長見寄小春

風埃九十里霧雨濕駝裘雁過回詩眼江寒聚晚愁魂

清方怯雪句冷更含秋殘岸連孤嶼依稀似橘洲

湘上閒居

夜清暑雨過四壁草蟲鳴一枕幽人夢半窓閒月明摧  
顏弘法志老大住山情忽憶陳尊宿宿編蒲度此身

西齋晝臥

餘生已無累古寺寄閒房睡足無來客窓空又夕陽叢  
蕉高出屋病葉忽飄廊起探風簷立飛蚊避晚涼

秋夕示超然

夜色已可掬林光翻欲流一鈎窺隙月數葉攪眠秋清  
境扶歸夢殘釭替客愁搜詩時畫席忽覺此生浮

次韻真覺大師瑞香花

淺色映華堂清寒熏夜香應持燕尾剪破此麝臍囊有  
恨成春睡無人見洗妝故山烟雨裏寂寞為誰芳

清明前一日聞杜宇示清道芬

籬外花如海閒軒小寢驚最先聞杜宇更覺近清明雲  
怒知為雨風和拗得晴阿芬甘劣我笑裏恰詩成

送僧歸故廬

投名身入社卧病偶思歸渡澗脫芒屨扶藤下翠微寒  
松猶帶雨瘦骨不勝衣若見空鑽紙當施百丈機

重會雲叟禪師

氣味似前輩見之長眼明閒須研法味老不減詩情草  
聖因蛇鬪禪枝解虎爭一堂聊寄傲疎快餞餘生

次韻衡山道中

嶽色墮馬首嵐光忽滿襟眼寒知意適句苦覺愁侵沃

野獻新綠殘晴釀晚陰天涯驚去雁料理欲歸心

次韻李方叔遊衡山僧舍

道鄉見城郭世路謾升沈寺勝增佳氣壁間餘醉吟僧  
殘過客少山好為誰深寧識通泉尉獨懷經濟心

題夢清軒

小軒人不到脩竹過牆生眼倦經長掩身閒夢亦清微  
風吹篆縷活火潑茶鎗遙想佳眠夕蕭蕭雨葉聲

燈花偶書

岑寂一閒僧  
春宵清興增  
竹窓催夢雨  
蘭室對禪燈  
世事知虛幻  
人情剪愛憎  
短長都分定  
不恨百無能



宋元詩會卷五十八